



”Naalakkersuisut sermimik imermillu avammut nioqquteqalernissamut pilersaarusiaat pillugu nassuiaat 2004-imersoq”-mut malinnaatitsissummik nassuiaammik kingusinnerpaamik UKA2017-imi saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Nalunaarusiarineqartussap takussutississavaisiunissami imermik sermimillu nunanut allanut nioqqutissiortalernissamut aporfusinnaasut aammalu nunarsuarmioqatigiit niuerfissuini niuernerpalaartumik unamminarsinnaasut nalunaarsussallugit. Nalunaarusiap aamma ersersissavaa sermimik imermillu avammut niueruteqarnissamut avungangaq pilersaarusiaq, imermik avammut niueruteqarnermi maannamut misilittagaalersimasut aallaavigalugit).

(Inatsisartunut ilaasortaq Jess Svane, Siumut)

(Siullermeerneqarnera)

Ukiaanerani ataatsimiinneq 2015-mi immikkoortoq 73 suliarineqarnerani Naalakkersuisut ilisimatitsissutigaa, piffissami 2016-2019 sermimik imermillu suleriesissamik piareersaasoqalersimasoq.

Tamanna tunuliaqutigalugu Demokraatinit tupigusuutigaarput Siumut-miit siunnersuut saqqummiunneqarmat, ilisimaneqareeraluartoq pineqartumut Naalakkersuisut suleriesissiamik aallartitsereeraluartut.

Taamatulli oqareerluta Demokraatiniit isumaqatigaarput sermimik imermillu tunisassiorsinnaaneq aningaasarsiornermik periarfissaqarluartoq. Kisiannili pisariaqarpoq aaliangersimasunik sinaakkusiinissaq eqqortumik periarfissiisinaanissaq pillugu.

Tamanna pineqartillugu Demokraatit pisariaqartippaat erseqqissassallugu pisorta qarfinnit tunisassiorneq nunattalu avataanut tunisassiorneq isumagineqartussatut isiginngimmassuk. Pisorta qarfinniit sinaakkutit isumagineqarpata namminersorlutik suliffiutillit suliffinnillu aallartisarniat aningaasaliissutinik periarfissinneqarsinnaapput, soorlu Greenland Venture aqutigalugu aammalu Greenland Business-miit siunnersorneqarsinnaaneq. Sakkortuumilli erseqqissarusunnarpoq pisorta qarfiit suliniutinit sukkanerpaamik tunuarseqqullugit, suliniutit inuutissarsiornermik niuernermillu namminerisaminik ingerlasinnaangornissaat anguniarlugu.

UKA 2015-mi immikkoortoq 73 suliarineqarnerani Demokraatit ima saqqummiussipput:

Inatsisartut Naalakkersuisut kaammattorpaat 2016-miit 2019-mut nilak imerlu pillugit pilersaarusiamut atatillugu pitsaasunik sinaakkutissanik pilersitsissasut namminersortut aallartissinnaaqqullugit ingerlatsisinnaaqqullugillu suliffimmik unammilleqatigiinneq tunngavigalugu imermik nilammillu tunisassiorsinnaasumik.



Oqaaseqaat Inatsisartunit akuerineqarpoq, Demokraatiniillu ilimagilluinnarparput Imermik sermimillu suleriesissaq suliarineqarnerani Naalackersuisut tamanna eqqaamasimassagaat.

Tamanna tunuliaqutaralugu Demokraatinit imermik sermimillu suleriesissaq ukiuni 2016-2019 Naalackersuisunit saqqummiunneqartussa qilanaaraarput, taamaattorli pisariaqartissorinngilarput Naalackersuisut nalunaajaammik suliaqarnissaat soorlu Siumut-miit siunnersuutigineqaraluartoq.

Tamanna tunuliaqutaralugu siunnersuut itigartinneqarnissaanut inassutigaarput.